

善 玉

耶

生 女

經

善生經

姚秦三藏法師佛陀耶舍共竺佛念譯

如是我聞，一時佛在羅閱祇，耆闍崛山中，與大比丘衆，千二百五十人俱，爾時世尊，時到著衣持鉢，入城乞食，時羅閱祇城內，有長者子，名曰善生，清旦出城，詣園遊觀，初沐浴訖，舉身皆濕，向諸方禮，東西南北，上下諸方，皆悉周遍。

爾時世尊，見長者子善生詣園遊觀，初沐浴訖，舉身皆濕，向諸方禮，世尊見已，即詣其所，告善生言，汝以何緣，清旦出城，於園林中，舉身皆濕，向諸方禮，爾時善生白佛言，我父臨命終時，遺勅我言，汝欲禮者，當先禮東方南方西方北方上方，我奉承父教，不敢違背，故澡浴訖，先叉手東面，向東方禮，南西北方，上下諸方，皆悉周遍。

爾時世尊告善生曰，長者子，有此方名耳，非爲不有，然我賢聖法中

，非禮此六方以爲恭敬，善生白佛言，唯願世尊，善爲我說，賢聖法中禮六方法，佛告長者子，諦聽諦聽，善思念之，當爲汝說，善生對曰，唯然願樂欲聞。

佛告善生，若長者長者子知四結業，不於四處而作惡行，又復能知六損財業，是謂善生，長者長者子離四惡行，禮敬六方，今世亦善，後獲善報，今世根基，後世根基，於現法中，智者所稱，獲世一果，身壞命終，生天善處。

善生，當知四結行者，一者殺生，二者盜竊，三者姪泆，四者妄語，是四結行，云何爲四處，一者欲，二者恚，三者怖，四者癡，若長者長者子，於此四處，而作惡者，則有損耗，佛說是已，復作頌曰：

欲恚及怖癡

有此四法者

名譽日損減

如月向於晦

佛告善生，若長者長者子於此四處，不爲惡者，則有增益，爾時世尊重作頌曰：

於欲恚怖癡

不爲惡行者

名譽日增廣

如月向上滿

佛告善生，六損財業者，一者耽湎於酒，二者博戲，三者放蕩，四者迷於伎樂，五者惡友相得，六者懈惰，是爲六損財業，善生，若長者長者子，解知四結行，不於四處而爲惡行，復知六損財業，是爲善生，於四處得離，供養六方，今善後善，今世根基，後世根基，於現法中，智者所譽，獲世一果，身壞命終，生天善處。

善生，當知飲酒有六失，一者失財，二者生病，三者鬪諍，四者惡名流布，五者恚怒暴生，六者智慧日損，善生，若彼長者長者子飲酒不已，其家產業，日日損減。

善生，博戲有六失，云何爲六，一者財產日耗，二者雖勝生怨，三者智者所責，四者人不敬信，五者爲人踈外，六者生盜竊心，善生，是爲博戲六失，若長者長者子博戲不已，其家產業，日日損減。

放蕩有六失，一者不自護身，二者不護財貨，三者不護子孫，四者常自驚懼，五者諸苦惡法，常自纏身，六者喜生虛妄，是爲放蕩六失，若長者長者子放蕩不已，其家財產，日日損減。

善生，迷於伎樂復有六失，一者求歌，二者求舞，三者求琴瑟，四者波內卑，五者多羅槃，六者首呵那，是爲伎樂六失，若長者長者子伎樂不已，其家財產，日日損減。

惡友相得復有六失，一者方便生欺，二者好喜屏處，三者誘他家人，四者圖謀他物，五者財利自向，六者好發他過，是爲惡友六失，若長者長者子習惡友不已，其家財產，日日損減。

懈惰有六失，一者富樂不肯作務，二者貧窮不肯勤修，三者寒時不肯勤修，四者熱時不肯勤修，五者時早不肯勤修，六者時晚不肯勤修，是爲懈惰六失，若長者長者子懈惰不已，其家財產，日日損減，佛說是已，復作頌曰：

迷惑於酒者	還有酒伴黨	財產正集聚	隨己復散盡
飲酒無節度	常喜歌舞戲	晝則遊他家	因此自陷墜
隨惡友不改	誹謗出家人	邪見世所嗤	行穢人所黜
好博著外色	但論勝負事	親惡無返復	行穢人所黜

爲酒所荒迷

貧窮不自量

輕財好奢用

破家致禍患

擲博羣飲酒

共伺他姪女

翫習卑鄙行

如月向於晦

行惡能受惡

與惡友同事

今世及後世

終始無所獲

晝則好睡眠

夜覺多悒望

獨昏無善友

不能修家務

朝夕不肯作

寒暑復懈惰

所爲事不究

亦復毀成功

若不計寒暑

朝夕勤修務

事業無不成

至終無憂患

佛告善生，有四怨如親，汝當覺知，何謂爲四，一者畏伏，二者美言，三者敬順，四者惡友。

佛告善生，畏伏有四事，云何爲四，一者先與後奪，二者與少望多，三者畏故強親，四者爲利故親，是爲畏伏四事。

佛告善生，美言親復有四事，云何爲四，一者善惡斯順，二者有難捨離，三者外有善來，密遮止之，四者見有危事，便排擠之，是爲美言親四事。

敬順親復有四事，云何爲四，一者先誑，二者後誑，三者現誑，四者

見有小過，便加杖之，是爲敬順親四事。

惡友親復有四事，云何爲四，一者飲酒時爲友，二者博戲時爲友，三者淫泆時爲友，四者歌舞時爲友，是爲惡友親四事，世尊說此已，復作頌曰：

畏伏而強親

美言親亦爾

敬順虛誑親

惡友爲惡親

此親不可恃

智者常覺知

宜速遠離之

如避於險道

佛告善生，有四親可親，多所饒益，爲人救護，云何爲四，一者止非，二者慈愍，三者利人，四者同事，是爲四親可親，多所饒益，爲人救護，當親近之。

善生，止非有四事，多所饒益，爲人救護，云何爲四，一者見人爲惡，則能遮止，二者示人正直，三者慈心愍念，四者示人大路，是爲四止非，多所饒益，爲人救護。

復次，慈愍有四事，一者見利代喜，二者見惡代憂，三者稱譽人德，四者見人說惡，便能抑制，是爲四慈愍，多所饒益，爲人救護。

利人有四，云何爲四，一者護彼不令放逸，二者護彼放逸失財，三者護彼使不恐怖，四者屏相教誡，是爲四利人，多所饒益，爲人救護。同事有四，云何爲四，一者爲彼不惜身命，二者爲彼不惜財寶，三者爲彼濟其恐怖，四者爲彼屏相教誡，是爲四同事，多所饒益，爲人救護，世尊說是已，復作頌曰：

制非防惡親

慈愍存他親

利人益彼親

同事齊己親

此親乃可親

智者所附近

親中無等親

如慈母親子

若欲親可親

當親堅固親

親者戒具足

如火光照人

佛告善生，當知六方，云何爲六方，父母爲東方，師長爲南方，妻婦爲西方，親黨爲北方，僮僕爲下方，沙門諸高行者爲上方。

善生，夫爲人子，當以五事敬順父母，云何爲五，一者供奉能使無乏，二者凡所有爲，先白父母，三者父母所爲，恭順不逆，四者父母正令不敢違背，五者不斷父母所爲正業，善生，夫爲人子，當以此五事敬順父母，父母復以五事敬視其子，云何爲五，一者制子不聽爲惡，

二者指授示其善處，三者慈愛入骨徹髓，四者爲子求善婚娶，五者隨時供給所須，善生，子於父母，敬順恭奉，則彼方安隱，無有憂畏。善生，弟子敬奉師長復有五事，云何爲五，一者給示所須，二者禮敬供養，三者尊重戴仰，四者師有教敕，敬順無違，五者從師聞法，善持不忘，善生，夫爲弟子，當以此五法敬事師長，師長復以五事敬視弟子，云何爲五，一者順法調御，二者誨其未聞，三者隨其所問，令善解義，四者示其善友，五者盡以所知，誨授不吝，善生，弟子於師長，敬順供奉，則彼方安隱，無有憂畏。善生，夫之敬妻，亦有五事，云何爲五，一者相待以禮，二者威嚴不褻，三者衣食隨時，四者莊嚴以時，五者委付家內，善生，夫以此五事敬待於妻，妻復以五事恭敬於夫，云何爲五，一者先起，二者後坐，三者和言，四者敬順，五者先意承旨，善生，是爲夫之於妻，敬待如是，則彼方安隱，無有憂畏。善生，夫爲人者，當以五事親敬親族，云何爲五，一者給施，二者善

言，三者利益，四者同利，五者不欺，善生，是爲五事親敬親族，親族亦以五事親敬於人，云何爲五，一者護放逸，二者護放逸失財，三者護恐怖者，四者屏相教誡，五者常相稱歎，善生，如是敬視親族，則彼方安隱，無有憂畏。

善生，主於僮使，以五事教授，云何爲五，一者隨能使役，二者飲食隨時，三者賜勞隨時，四者病與醫藥，五者縱其休暇。

善生是爲五事教授僮使，僮使復以五事奉事其主，云何爲五，一者早起，二者爲事周密，三者不與不取，四者作務以次，五者稱揚主名，是爲主待僮使，則彼方安隱，無有憂畏。

善生，檀越當以五事供奉沙門，云何爲五，一者身行慈，二者口行慈，三者意行慈，四者以時施，五者門不制止，善生，若檀越以此五事供奉沙門，沙門當復以六事而教授之，云何爲六，一者防護不令爲惡，二者指授善處，三者教懷善心，四者使未聞者聞，五者已聞能使善解，六者開示大路，善生，如是檀越恭敬奉沙門，則彼方安隱，無有憂

畏，世尊說已，重說偈曰：

父母爲東方	師長爲南方	妻婦爲西方	親族爲北方
僮僕爲下方	沙門爲上方	諸有長者子	禮敬於諸方
敬順不失時	死皆得生天	惠施及輟言	利人多所益
同利等彼已	所有與人共	此四多負荷	任重如車輪
世間無此四	則無有孝養	此法在世間	智者所選擇
行則獲大果	名稱遠流布	嚴飾於牀座	供設上飲食
供給所當得	名稱遠流布	親舊不相遺	示以利益事
上下常利同	於此得善譽	先當習技藝	然後獲財業
財業旣已具	宜當自守護	出財未至奢	當選擇前人
欺誑抵突者	寧乞未舉與	積財從小起	如蜂集衆花
財寶日滋息	至終無損耗	一食知止足	二修業勿怠
三當先儲積	以擬於空乏	四耕田商賈	擇地而置牧
五當起塔寺	六行慈濟事	在家勤六業	善修勿失時

如是修業者	則家無損滅	財寶日滋長	如海吞衆流
雞鳴當早起	披衣來下牀	澡漱令心淨	兩手奉花香
佛尊過諸天	鬼神不能當	低頭遶塔寺	叉手禮六方
賢者不精進	譬如樹無根	根斷枝葉落	何時當復連
採華著日中	能有幾時鮮	放心自縱恣	命過復何言
人當慮非常	對來無有期	犯過不自覺	命過爲自欺
今當入泥犁	何時有出期	賢者受佛語	持戒慎勿疑
佛如好華樹	無不愛樂者	處處人民聞	一切皆歡喜
令我得佛時	願使如法王	過度諸生死	無不解脫者
戒德可恃怙	福報常隨已	現法爲人長	終遠三惡道
戒慎除恐懼	福德三界尊	鬼神邪毒害	不犯有戒人
墮俗生世苦	命速如電光	老病死時至	對來無豪強
無親可恃怙	無處可隱藏	天福尙有盡	人命豈久長
父母家室居	譬如寄客人	宿命壽已盡	捨故當受新

各追所作行

無際如車輪

起滅從非福

生死十二因

現身遊免亂

濟育一切人

慈傷墜衆邪

流沒於深淵

勉進以六度

修行致自然

是故稽首禮

歸命天中天

爾時善生白世尊言，甚善世尊，實過本望，踰我父教，能使覆皆得仰，閉者得開，迷者得悟，冥室燃燈，有目得視，如來所說，亦復如是，以無數方便，開悟愚冥，現清白法，所以者何，佛爲如來至真正覺，故能開示，爲世明導，今我歸依佛，歸依法，歸依僧，唯願世尊，聽我於正法中爲優波塞，自今日始，盡形壽不殺生，不偷盜，不邪淫，不欺誑，不飲酒，爾時善生，聞佛所說，歡喜奉行。

善生經

玉耶女經

遺譯人名附西晉出釋覺權謹錄

聞如是，一時佛在舍衛國，祇樹給孤獨園，爲諸四輩子弟說經，是時

國中給孤獨家爲子娶婦，得長者女，名曰玉耶，端正殊特，不以婦禮，輕慢公姑及以夫壻，給孤獨長者夫婦議言，是婦不順，當云何教，若加杖捶，非善法也，設不教訶，其罪日增，長者議曰，惟佛能化，明日嚴服，往詣佛所，稽首禮足，前白佛言，我爲子娶婦，得長者女，甚大嬌慢，不以婦禮，惟願世尊哀愍我等，并諸弟子，明日勸請，到舍說經，令心開解，佛即受請，長者歡喜，禮佛而歸，長者到舍，廣設調度，嚴飾牀座，明日佛來，到長者舍，長者欣慶，請如來入舍，衆坐已定，皆各禮佛，卻住一面，佛飯食訖，并爲說經，惟有玉耶，嬌慢不出，佛念愍之，放大神力，變長者家皆化作水精色，內外相照，無有障礙，玉耶見佛三十二相八十種好，衣毛爲鬘，戰慄惶怖，即出禮佛，卻住一面，合掌低頭，默無所說，佛語玉耶，女人不以面貌端正，不順夫壻非爲端正，心端形正是爲端正。

玉耶惶怖白佛言，世尊，願佛教我婦人之禮，其事云何。佛語玉耶，婦事夫壻公姑大長，有五善三惡，何等五善，一者後臥早起，美食先

進，二者搥罵不得懷恚，三者一心向夫，不得邪姪，四者願夫長壽，以身奉使，五者夫婿遠行，整理家中，無有二心，是爲五善，何等三惡，一者輕慢夫婿，不順大長，美食自噉，未冥早臥，日出不起，夫婿教誨，瞋目怒應，二者見夫不歡，心常敗壞，念他男子好，三者願夫早死更嫁，是爲三惡，玉耶默然，無言可答，佛語玉耶，世間下有七輩婦，爲汝說之，一心善聽，一者母婦，二者妹婦，三者知識婦，四者婦婦，五者婢婦，六者怨家婦，七者奪命婦，汝今解否，玉耶答言，不及此義，佛言，善聽，吾今解之，何等母婦，愛念夫主，如母愛子，晝夜長養，不失時宜，心常憐念，無有厭患，念夫如子，是爲母婦，何等妹婦，承事夫婿，盡其敬誠，如兄如弟，同氣分形，骨血至親，無有二情，尊之重之，如妹事兄，是爲妹婦，何等知識婦，奉事夫婿，敬順懇至，依依戀戀，不能相遠，私密之事，常相告示，行無違失，善事相教，使益明慧，相親相愛，欲令度世，如善知識，是爲知識婦，何等婦婦，供養大人，竭情盡行，無有一二，淨修婦禮，

終不廢闕，進不犯義，退不失禮，常和爲貴，是名婦婦，何等婢婦，心常畏忌，不敢自慢，忠孝盡節，口不羸言，身不放逸，以禮自防，如民奉王，夫婿敬幸，不得嬌慢，若得杖捶，敬承奉受，及見罵辱，默然無辭，甘身苦樂，無有二心，慕修婦道，不擇衣食，事夫如事大家，是名婢婦，何等怨家婦，見夫不歡，恆懷瞋恚，晝夜求願，欲得遠離，雖爲夫婦，心常如寄，亂頭勤臥，無有畏避，不作生活，養育兒子，身行姪蕩，不知羞恥，陷入罪法，毀辱親里，夫婿相憎，呪欲令死，是名怨家婦，何等奪命婦，晝夜不眠，毒心伺之，作何方便，得遠離之，欲與毒藥，恐人覺之，心外情通，雇人害之，復遣傍夫，伺而賊之，夫死更嫁，適我願之，是名奪命婦，佛語玉耶，其有善婦者，當有顯名，宗親九族并蒙其榮，天龍鬼神擁護其形，使不枉橫，財寶日生，萬分之後，願願不違，上生天上，宮殿浴池，在所自然，天人樂之，天上壽盡，還生世間，常爲富貴，侯王子孫，端正姝好，人所奉尊，其惡婦者，當得惡名，今現在身，不得安寧，數爲鬼神，

在於家庭，起病發禍，求及神明，會當歸死，不得長生，惡夢恐怖，所願不成，多逢災橫，水火日驚，萬分之後，魂神受形，死入地獄餓鬼畜生，其身矧短，咽如針釘，身臥鐵牀，數千萬劫，受罪畢訖，還生惡家，貧窮裸露，無絲無麻，孜孜急急，共相鞭撻，從生至死，無有榮華，作善得善，作惡自遮，善惡如此，非是虛也，佛語玉耶，此是七輩婦，汝用何行，玉耶流淚，前白佛言，我本愚癡，不順夫尊，自今已後，當如婢婦，盡我命壽，不敢驕慢，即前長跪，求受十戒三自歸命，歸佛歸法歸比丘僧，一不殺生，二不偷盜，三不邪淫，四不妄語，五不飲酒，六不惡口，七不綺語，八不嫉妬，九不瞋恚，十者信善得善，是名十戒，此優波夷所行，佛說經竟，及諸弟子皆各欲還，給孤獨長者眷屬歡喜，禮佛而退，玉耶長跪重白佛言，我本愚癡，驕慢夫婿，今蒙世尊，化導我等，令心開解，佛語玉耶，自今已後，擁護汝家，玉耶言諾，受佛言教，不敢有違，稽首禮足，受退還歸。

玉耶女經

中華民國二十八年八月
附印功德芳名 (恕不稱呼)

板城圓島菩提學院釋慧徹經募

贈送

許徧傳七〇冊

開封安玉祥二〇冊

安隆康一〇冊

安俊英一〇冊

安陳鑫茹二〇冊

安俊卿一〇冊

本市王崑山六冊

李 謙三冊

李圓修二〇冊

釋如慧五冊

釋培根二〇冊

釋慧觀一二冊

楊岳氏一〇冊

劉現剛五冊

劉楊氏五冊

申楊氏五冊

楊秀岩五冊

釋如實四〇冊

普為出資善信及讀誦受持展轉流通者回向偈曰

以此功德殊勝行

無邊勝福皆回向

普願法界諸有情

同得佛法真常樂

#2

424150

中華民國三十七年一月出版

善生
玉耶女經 一冊

校對者 劉 振 河

承印者

廣佛經流通處

電話四局一四四五

北平東城大佛寺內